

四庫全書

集部

欽定四庫全書

集部
秋崖集卷三

詳校官起居注主事臣顧宗泰

主事臣呂雲棟覆勘

總校官進士臣朱 鈐

校對官學正臣翁樹棠

謄錄監生臣鄒世俊

欽定四庫全書

集部四

秋崖集

別集類三 宋

提要

臣等謹案秋崖集四十卷宋方岳撰岳字巨山號秋崖歙縣人紹定五年進士淳祐中為趙葵叅議官移知南康軍以杖舟卒忤荆帥賈似道後知袁州又忤丁大全被劾罷歸其集世有二本一為秋崖新稿凡三十一卷乃

從宋寶祐五年刻本影抄一為秋崖小稿凡
文四十五卷詩三十八卷乃明嘉靖中其裔
孫方謙所刊今以兩本叅校嘉靖本所載較
備然寶祐本所有而嘉靖本所無者詩文亦
尚各數十首又有別行之本題曰秋崖小簡
較之本集多書札六首謹刪除重複以類合
編併成一集勒為四十卷岳才鋒凌厲洪焱
祖作秋崖先生傳謂其詩文四六不用古律

以意為之語或天出可謂兼盡其得失要其
名言雋句絡繹奔赴以駢體為尤工可與劉
克莊相為伯仲集中有在淮南與趙葵書責
葵馭軍之失指陳切直不失為忠告至葵兄范
為帥失律致襄陽不守所繫不輕其罪亦復
不小岳以居葵幕府之故乃作書曲為寬解
載之集中則未免有愧詞矣乾隆四十六年
四月恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

秋崖集卷一

詩 五言絕句 六言絕句 七言絕句

宋 方岳 撰

山居十六詠

入山林處

窮塗一何慟多岐一何泣指似世間人路頭從此入

幽谷

入林不厭深避世不厭獨倦飛鳥知還毋憚下喬木
便是山

東臯或巾車西園亦飛蓋以我方古人兩脚大自在

石梯

山險者夷之梯以石齒齒於間遂成臺有梅適堪倚

清樾

山林有灌木其大可蔽牛蘄石眠清陰坐間天地秋

雪林

若以雪見我以林為吾家君其非詩人不能識梅花

小山

拳石以為山勺水以為池我觀於世間何者非兒嬉

桃李蹊

竹逕轉西麓山花能白紅要知造物心政在無言中

歸來館

歸來遽云出既出又歸來自處苟如此淵明安在哉

着圖書所

鍾乳三千兩胡椒八百斛笑殺山中人破紙塞故屋

草堂

烟低一片春留與貧受用阿連自能詩吾哀不復夢

錦巢

佳日春酣酣一色錦步障誰知山中人如此富貴相

寒泓

子盍觀於泉遇險維其止流行非所知一寒清到底

飯牛庵

寧與厓下人烟雨耕犂確讀書亦何為謹勿累吾角

秋厓

鑿空為此名忽已落衆口聊結一間茅承當作厓叟

田園居

秋風新飯香蔬亦美可茹寧知世有人萬錢無下筋

次韻方蒙仲高人亭

此君歟吾室高人跂吾亭邂逅兩相逆保此歲晚青

茗盃漱藜苒詩腸許堅頑是間可無我不可無此山

鷗鷺之與侶竹石之與居子虛亡是公付之渴相如
苔寒雨不借對面寧爾勞欲語二三子卑之母甚高
愛之不我疎狎則不我親山耶其竹歟君子哉若人
吾儕磊塊胸所見不相遠借我竹外山一榻供晝偃
烟霏日夕佳隱固勝於顯孰從而詩之要亦山一蹇
終南有捷徑澗惡而林羞其人豈其山寧勿相累不
相從文字盟不與如此酒他日有移文毋令猿鶴受
老子可林壑諸公自烟霄緬懷歸耕歸底用招隱招

以嗜酒愛風竹卜居此林泉為韻作十小詩
居千卿者三至九卿者四不博牛背眠鹹酸信殊嗜
玉虹橫吾腰金貂直吾首寧知千載名不如一杯酒
事有俄頃間遺臭及萬代吾觀於斯人不過一字愛
東坡真天人落筆蓬萊宮何如赤壁笛一鶴橫秋風
周有說愛蓮陶有詩愛菊吾居則誰與其諸子猷竹
朝吾一簞簪夕吾一觥觥詩腸其殷雷此事底須卜
秋雲七尺藤夜雨一卷書寂寞空山人微此誰與居

吾心如鐵石命則薄於紙藉口見古人則亦賴有此
彭殤同此軀顏跖同此心哀哉宇宙間羣生政林林
吾猶金在冶惟冶者所甄謹毋出光怪夜半號龍泉

以人生五馬貴莫受二毛侵為韻送胡獻叔守

邵陽

燈寒嶽麓雪帆飽湘江春過家誰起予豈無獨醒人
襄蜀莽萬里戰骨高於城湖南寧幾州耕鑿偷餘生
民愚一何鼠民怒一何虎謹毋芟刈之持以報九五

寧騎踏雪驢莫驟追風馬霜蹄失銜勒多是快意者
三十已專城斯亦未足貴潘輿歸故鄉吾樂寧可既
維東有夕烽維西有秋柝行春獨何悰此段待民莫
飫以瀾翻口箱以霹靂手俗吏訾儒腐吾曹自甘受
吾道一而已惟誠一之至毋或參以三亦勿貳以二
借籌渭陽幕邊畫分毫毛邵州二千里能勿鑒寐勞
迢迢烟水寒獵獵霜風侵此行何當還民瘼簡帝心

此君室

匪書誰與稽匪竹誰與居以書造竹所俯仰千載餘
亭亭幾長身斯可謂之士以我為隱乎指以二三子
不肯一世草木自賓友舉杯問樵嵐見有此客否
可臞不可腴可獨不可俗君看室中人今已不翹足
曲士多在今節士多從古此君豈易得僅可一二數
條然數竿玉帶以一溪水惟我有是夫孰能與於此
泉石寧我癖烟雨寧我昏是間有佳趣不可無此君
一逕自明月誰能此娑娑床頭易未了如此良夜何

竹意吾為誰山曰子非我未知回孰賢自贊午也可
俗士不足語之子誰與娛閉門但癡坐爾輩寧可無

山逕

一逕淨於秋山中夜來雨倚松不知還幽禽妙言語

湘源莊舍

饒虎過新蹄怒狸爭舊穴悲哉兩翁姥西山采薇蕨

夢書十字史記冊上太史公此書真是筆幹造
化夢語非夸也因足之識於策

禹穴探幽眇神功接混茫絕麟纔此筆春夢試平章

斑竹夫人

山谷青奴娛夜秋崖斑媛專房爾家婕妤好失笑爾孫流落荒涼

演雅

蟪蛄網羅遺逸離留勸課農桑鳴蜩吸風飲露反舌吹笙鼓簧

蒼鷹守株待兔白鷺臨淵羨魚鴟鵂婦嘆於室蝸牛亦

愛吾廬

趙玉汝自作戲墨各題六言其上

鵲鳩

村北村南雨暗舍東舍西水生去婦復還何日烟簑處
處春耕

鷺鷥

雪以一江烟水風乎兩岸菰蒲但得魚磯無恙曲肱之
外何須

春令

水落寒塘初冷霜倒枯荷半傾莫倚尾能涎涎踏沈一片秋聲

鸛鵒

晴樹暖以流憩霜實飽而倦飛何與人間世事再三自整緇衣

立春

國忌謂之啞春

適禁樂令春啞先辦秋治社聾銀勝鬢毛班白瓊絲菜

縷青紅

謝人致蟹

樵嵐無蟹有監州已負詩腸過一秋
莫怪淵明便歸去得渠自合老菟裘

此去江頭只兩程寒蒲解縛便橫行
無腸政要空虛腹滿貯蘆花與月明

雪砍雙螯玉一壺樵中曾有此奇無
始知張翰思歸意不為秋風只為鱸

除却金釐霜後棖更無一物可詩情誠齋配以彭生鸞
豈不寬哉五鼎烹

送荔子方蒙仲

風枝露葉走筠籠玉潤冰寒擘綉紅
自往胃中評史記
久間格調略相同

曾識坡仙海上山清冰寒露洗熇祥
老天不與詩為地
却欠閩中住一番

即事

自刈香秔稅水春旋芻新酒搗泥封晚菰種已無餘地
不枉歸田學老農

贈詩僧

瀑泉癩可能詩最畢竟難為本色僧要識廬山真面目
一溪明月冷於冰

從來佛法無多子底用芒鞋半九州贏得諸人詩滿袖
草深一丈法堂秋

蒙恩予祠

堅卧牛庵飽歲寒恩書初許作黃冠孫僊彭老如相問
筋力猶堪上醮壇

月明弄影雪巔癯只似胡僧不似吾忽予牙緋稱羽客
道官儒黻釋頭顱

禱晴福善

稻壓田塍米似珠老農為說幾年無一晴不費君王力
莫等香烟上化爐

夜落簷花未肯晴燈寒等不到天明自憐短髮垂垂老

一滴秋霖白一莖

背犢腰牛忽解顏摩挲一飽政相關王於霓望無終極
孰與侯邦年歲間

題致堂新州坐石

辛亥

蒼寒瘴面新州石直不話頭傳不休秦負儒耶君誤矣
二書今與大江流

稜層不隔梅花嶺萬里相從識兩翁却怪牧牛亭下路
石麟咫尺卧秋風

九日墨紫開

九日年年負物華
野香未肯到山家
今年九日風光別
不獨黃花更紫花

中秋日社未五鼓祀社歸月明如晝

月明如水帶寒流
飲福靈壇曉未收
不是社公喚我起
何緣一日兩中秋

次韻杜監簿

風雨重陽又一秋
白衣人至復何憂
東籬只此黃花是

未必淵明風馬牛

社曲無邊風露秋甕頭酒熟了無憂一詩連夜穿兵衛
略似齊城戰火牛

贏得蕭蕭兩鬢秋山城斗大轉多憂人間縱有萬錢鶴
身外何如十具牛

不須把淺不防秋底事山樵亦過憂說與諸公那解此
但知兩角戰蝸牛

明日詩至過相稱謂次韻還之

捲還一幅玉壺秋無實之名我所憂不似蒙莊解齊物
以吾為馬以為牛

次韻程弟

一船月自不嫌貧伴我荒灣理釣緡歸去莫橫深夜笛
怕驚溪友與山賓

三徑風烟手自開春猿秋鶴幾徘徊松根石銚烹魚眼
老子行山又一回

擢援茅茨隱者家底須日歷記年華山花山草無終極

秋後寂寥春自葩

眼中轉覺可人稀得似孤雲自在飛
花落花開俱有意
略於閒處見幾微

草堂四壁一瓢空舉世無人與我同
黃犢山南又山北
犁春猶有古人風

柴門雖設不曾開俗面向人三寸埃
却是前溪雙白鷺
門闌不住又飛來

壘麴成臺糟築丘哀遲無復少年遊
君看烟草離離外

不問人間第一流

莫為盤飧烹不鳴借公松石聽溪聲
貂蟬只是麒麟楨
寄語諸公卿自卿

魚鳥相忘不世情浮生於我一絲輕
夜涼月色光如水
莫遣微雲滓太清

此腹寧須文字香漫淹蘼蕪半青黃
千窓一枕勦勦睡
世上何人最得忙

書維揚張君梅卷

平生何遜揚州夢到得揚州月自寒誰遣雪蓬春半樹
詩情更作故人看

月明臨得霜橋影只恁橫斜自一奇喚起江南歸夢遠
竹村烟水有茅茨

雪中迓新憲

踏碎瓊瑤千里寒新年纔此試吟鞍不須更說逢迎惡
只作灞橋詩興看

雪後草亭

梅花面目冷於冰亦笑山翁草作亭一夜雪寒重整過
碧琉璃瓦水晶釘

雪後梅邊

老來筋力倦登山契濶梅花幾日間莫與梅花筋力倦
且推一雪阻躋攀

其二

與君只隔竹笆籬踏雪過從自一奇開口便遭花問當
老夫媿面了無辭

其三

半身蒼蘚雪槎枒直到頂頭纔數花
看盡玉林山上下還須渠是當行家

其四

花中淡竚只梅花未見梅中萼綠華
一色瓊瑤裾織翠尚嫌紅蠟蒂村些

其五

玉蕤五出是天姿六出時時更絕竒
夜半同參雪花去

春風元自不曾知

其六

小小茅亭面面寒
玉花能薄雪花乾
今年不是開遲著
等得羣花比並看

其七

一枝密密一枝疎
一樹亭亭一樹枯
月是毛錐烟是紙
為予寫作百梅圖

其八

野迳茅茨竹作牆
歲寒曾亦幾平章
高人風味天然別
不在橫斜不在香

其九

寒雀羣飛最上頭
啄殘香玉翠雲裘
老坡詩裏么麼鳳
待與梅花渠是不

其十

春風且莫一齊開
留與山翁逐日來
只恐難將冰雪面
伴渠桃李併塵埃

觀梅

蒼烟喬木野人家數掩山籬一徑斜此老不知何面目
只將空手對梅花

其二

卧疴半月不曾來等得來時漸次開世外交情無久近
歲寒然後始知梅

其三

幾日商量雪不成竹邊寒得瘦稜層秋崖老子縮如蛭

撚斷吟髭寸寸冰

其四

片片隨風隔塢飄
野香相逐過溪橋
今年便覺春風早
雪不成綿到地消

其五

較似年時劣不如
花頭小小兩疎疎
但令半點微酸在
憔悴空山儘有餘

其六

老樹槎枒只一花氣條亦不放橫斜無風無雨無烟月
獨立人間莫怨嗟

其七

去年今日雪平簷燒葉談詩酒屢添一笑今年又今日
不成飛絮不成鹽

寄梅

枝北枝南恨未除春風誤到壽陽居詩家不識梅花諱
把做好看誇道渠

代贈

碧玉香深冷翠簪
夢魂不到玉搔頭
暮天欲雪寒如此
且問梅花愁不愁

壬寅元日

一元塊北先天易
萬物胚脾太極圖
自嚼梅花冰片片
無人先後飲屠蘇

癸卯元日

政坐聰明誤迺翁
莫將鞭影戲兒童
春臯本分扶犁手

共駕烏犍待歲豐

其二

遠色蒼茫草際烟
春風也到雪崖邊
不知醉後屠蘇酒
增一年歟減一年

立春

冰絲玉縷簇青紅
已逗花梢一信風
夢到謝池新雪盡
暖烟含雨綠匆匆

其二

絲燕雙簪翡翠翹
巧裁銀勝試春韶
東風已到闌干北
看見嬌黃上柳條

其三

池痕吹皺綠粼粼
才見池痕認得春
香沁綠鞭旗脚轉
自題蘭帖記春新

立春都堂受誓祭九宮壇

欠伸殘夢雪髻鬆
只等三茅午夜鐘
傳鑰省門星斗濕
不知春已轉蒼龍

其二

輦路香融雪未乾
雞人初唱五更寒
瓊幡第一番花信
吹上東皇太乙壇

立春謝司法有詩次韻

明日瓊幡遶鬢飛
土牛纔出草痕肥
送寒正不關渠事
雪不來時未肯歸

其二

誰將健筆破天葩
清曉園林盡是花
寒入崖雲齋未久

詩腸雖吼尚禁茶

私忌

其三

一夜掇雲作雪飛
池塘已自綠生肥
憑君檢校闌干北
柳上新青歸未歸

其四

草亭亦欲識詩葩
連夜開將雪樹花
清處儘強陶學士
不關羔酒與龍茶

君用致紅梅云不開數年矣

山家已作枯槎看帶雪移來却自春一夜揣摩花意思
寧將醉面向村人

再用韻奉酬

灞橋洗淨冰霜面拂略潮紅笑向春莫作野桃看過了
煩詩說似武陵人

昔公安在見何晚寧欲霜埋不受春不是三生曾一面
寧堪開向世間人

婺源道中

夢中綠遍謝家池夢覺山村雪擁籬儘道春寒花未
曉來開到野棠梨

春夜

酒不能多詩又塵欄干月午奈何春天寒莫到海棠瘦
一夜東風吹倒人

湖上八首

沙暖鴛鴦傍柳眠春來亦懶避湖船佳人窈窕惜顏色
自照晴波整翠鈿

今歲春風特地寒
百花無賴已摧殘
馬塍曉雨如塵細
處處筠籃賣牡丹

輕塵不動雨霏微
堤外芹香燕子飛
庭院日長簾幙靜
含情脉脉看春歸

綠波如畫雨初晴
一岸烟蕪極望平
日暮落花風欲定
小樓絃管壓新晴

春連禁籞綠陰交
對面晴烟舞翠蛟
最是君王遊幸少
宮花渾未識鳴鞘

連天芳草晚淒淒
蹀躞花邊馬不嘶
蜂蝶已歸絃管靜
猶聞人語畫橋西

遊人抵死愛春韶
風暖花香酒未消
須向先賢堂上去
畫船無數泊長橋

鞦韆人散雨千絲
誰把秦箏隔院吹
但覺小橋烟外柳
春風無力逞腰支

夢中

屋頭晴哢已交交
更向春風打一遭
花片已肥紅欲綻

柳絲烟重綠如縑

社日

燕子今年措社來
翠餅猶有去年梅
丁寧莫管杏花俗
付與春風一道開

社日益明叔見過

溪雲醞釀社公雨
肯踏寒莎過阿戎
亦有小詩拈未出
且攜瀑布煮春風

春思

楊柳生寒莫上樓夕陽芳草泥人愁
情知社近迎新燕
盡捲湘簾不下鉤

杜鵑花落石闌干新染晴波綠
遶灣小立佇詩風滿袖
一隻睡鴨占春閒

清明日舟次吳門

蓬窓恰受夕陽明楊柳梨花半月程
老去不知寒食近
一篙烟水載春行

片片飛花更異鄉人家插柳抵愁長
晴沙烟草幾今古

春去春來燕子忙

清明

淡烟疎雨清明日
飛絮落花遊子心
燕話春愁初睡起
一簾草色暮池深

次韻梁倅

把住新花做好看
傷春時共倚闌干
醉中不記暮烟碧
楊柳樓深燕子寒

次韻陳侍郎謝送牡丹

人在金華殿角頭詩情却遣為花留春風不入癯仙眼
六六峰寒隔幾州

手劖蒼苔玉一攔山家初見眼猶寒移根莫厭凡紅紫
只做春風一樣看

次韻牡丹

銀壺貯雪褪輕紅費盡思量句不工若使春風但桃李
春風殊未可雌雄

嬌紅深倚翠雲團髣髴三生吳綵鸞詩眼頓驚春富貴

雨侵衫袖不知寒

次韻雙頭牡丹

春入多情草木妖
霓裳相倚奏咸韶
玉欄一樣紅如洗
不比觚稜鎖二喬

溪店回文

啼鶯幾處垂垂柳
乳燕雙飛片片花
溪淺度雲山帶雨
岸崩歌樹草連沙

春望

春深酒熟溪橋鼓午過齋聞野寺鍾花不知名香自永
倚風臨水為誰容

聞鶯

綠窻愁寂雨淒淒春老江南花亂飛鶯亦自知人意思
垂楊深院盡情啼

約魯山兄

莫說尋芳已後時春疏解甲茗寨旗松風石鉞晴雲盃
不是吾曹未必奇

春暮

卷中未有好詩看
草滿池塘夢已闌
客又不來春又暮
一簾新雨杏花殘

春晚

一樽無計遣春留
落日傷情獨倚樓
柔綠拍堤如可染
老紅滿徑為誰愁

青梅如豆帶烟垂
紫巖成拳著雨肥
只有小橋楊柳外
杏花未肯放春歸

山杏溪桃睡欲昏
青旗邀客過孤村
楊花不肯隨春去
惹住晴風自入門

秋崖集卷一

欽定四庫全書

秋崖集卷二

宋 方岳 撰

詩 七言絕句

次韻謝兄立春戲擬春帖子

泉脉晴融太液池
內人初曉玉參差
東風認得農祥正
吹作豐年御製詩

天家觀闕玉重重
逼入東皇一信風
生意無邊青欲動

微茫淡靄暖烟中

天地春回萬壽杯
宮雲留雪玉崔嵬
曉供帖子瓊幡重
攜得韶風下殿來

天與君王共一仁
只將仁與物為春
要令率土無枯槁
未賞冰池皴玉粼

青旗簇仗賜銀幡
共以昇平奉至尊
閭闔千官花底散
紫泥香熟詔書溫

春思

烟草茸茸匝岸齊
晴天鳧浴喜清溪
一春造化花開盡
大欠渠詩共品題

春風多可太忙生
長共花邊柳外行
與燕銜泥蜂釀蜜
纔吹小雨又須晴

春詞

翠鼎香深旋作茶
餘醒牽夢幾還家
夢中記得春池綠
曾共丁寧下番花

花不知愁句又塵
晚寒獨自倚欄頻
一分心事一分雨

春負予耶予負春

剪得春詞不忍看
雨深怕近碧闌干
春無此力吹成雪
未必杏花能耐寒

草色將寒上客衣
柔情只了得花飛
湘簾不隔社公雨
百姓人家燕未歸

一春直是柳風流
只恁風流只恁愁
客又不來寒食近
碧蘅紅杜滿芳洲

道中即事

春泥滑滑欲濺裾肯為梅花顧草廬喚作詩人看得未
雨臺笠雪一肩輿

家人不寄屢屢詩直恐藁砧官尚微到了不過相愛耳
未論此語是耶非

十日山寒雨不休僕其痛矣得無愁老夫自愛歸程好
肯為春泥怨鵲鳩

梅已飄零尚典刑斷魂籬落野烟青靈均憔悴迺知此
到老可人寧獨醒

華確連雲路不分雲侵衫袖白紛紛亦知雲自青山出
不見青山只有雲

衡雨衡風莫管渠晨炊蓐食便巾車能無幾日到茅舍
睡到日高相折除

對竈何妨客燎衣溪翁且莫鍵柴扉日之夕矣樵風冷
敲鯨一牛將犢歸

上到春山頂顚頭更攜烟雨入吾州梅花便作鄉人看
飛落酒杯相勸酬

畫中亦愛雨中山連雨山行却厭看一夜東風吹作雪
問誰畫我訪袁安

野漲平溪已斷橋悔將辛苦上岩堯朝來雨斷纔堪厲
依舊綠楊山迢迢

晨光漏日鳥深春况此泥行雨宿人夜半瓦鳴驚夢覺
悔將蓬笠當勞薪

田翁不省雪模糊緊閉柴門擁地爐自許小庵分席坐
是間寧復着吾徒

剡溪船後灞橋驢着我荒村一筍輿
却後幾年俱作畫
未知雪句定何如

農謠

春雨初晴水拍堤
村南村北鶉鴝啼
含風宿麥青相接
刺水柔秧綠未齊

問舍求田計未成一蓑鉏月每含情
春山樹暖鶯相覓
曉隴雨晴人獨耕

小麥青青大麥黃
護田沙逕遶羊腸
秧畦岸岸水初飽

塵甑家家飯已香

雨過一村桑柘烟
林梢日暮鳥聲妍
青裙老姥遙相語
今歲春寒蠶未眠

漠漠餘香著草花
森森柔綠長桑麻
池塘水滿蛙成市
門巷春深燕作家

觀天井

雷斧何年鑿翠成
老龍吟苦雪濤驚
霜晴未用為霖在
留與春蓂作太平

上已遊顯親寺題其壁

一犁初試繭栗犢兩岸對鳴晴雨鳩
搖落碧桃花片片
石闌干下釣魚舟

其二

松房小雨留客竹迳深深鳥喚人爛醉不知三月暮
等閒又是一年春

其三

芳草垂楊水底天半晴半雨作春妍
幅巾道服篷船坐

不是詩僊卽酒僊

其四

屬玉雙飛水滿塘
石爐柏子掩山房
一瓶瀑煮春風濕
只聽松聲意自長

胡登仕送花

一年春是牡丹時
不負花時只有詩
老去自知才思盡
枉分風月到山籬

其二

紅酣紫膩不勝春
肯上先生墊角巾
芳草醉眠今老矣
惜花心在怕花嗔

題八士圖

雅聞八士春俱秀
未覺三賢迹已陳
投分不論曾識面
此圖到手便情親

飛絮遊絲芳草路
淡烟疎雨落花天
偶然畫出尋詩意
未必新詩待畫傳

次韻酬率翁

戍樓夢不到中州杜牧新愁亦倦遊
留得荷鋤雙手在山寒芋栗要人收

但得清溪裹草堂溪頭山色有炎涼
秋崖一出四年矣想見松花滿石床

山樊

只有江梅合是兄水僊終似號夫人
季方政爾難為弟每恨詩評未逼真

竹屋寒無石鼎烟春風吹作白龍涎
平生奇處何關染

字以山樊亦自然

重宿儲文乙巳

只有詩囊澹似僧却嫌官屋冷於冰
桃花儘賴春風笑慣與劉郎面熟能

次韻別友

長汀草色恨連天一片飛紅漲綠川
寒入湘簾君又去只隨燕子過年年

有客

河漢微明星乍稀
碧蓮香濕襲人衣
夜涼如水琉璃滑
自起開窗放月歸

山家

午陰蒙密路縈紆
兩兩麗黃對引雛
自可曲肱驚短夢
南山叢薄有於菟

明月相看未厭貧
好風無價一披襟
苔簷不掃少來往
兩部鳴蛙草自深

夜大風

一夜東風太放顛草塘打破釣魚船
賴渠自任脩船費無數亂堆榆莢錢

夜雨屋漏

莫怨垂龍橫見治滿床詩卷盡淋漓
人間書疏何為者徑挽天河一洗之

重午

重午無人肯訪臨竹低沙淺綠連陰
倚松自讀離騷坐一笑獨醒江水深

茉莉

閨雨揉香摘未稀
鈎簾頓覺暑風微
只應雪外梅花笑
肯與兒曹入枕幃

素馨

雪骨冰肌合耐寒
怕寒却不離家山
老夫懷土與渠等
一釵移來得許頑

次韻楊梅

筠籠帶雨摘初殘
粟粟生寒鶴頂殷
衆口但便甜似蜜

寧知奇處是微酸

方紅

炎蒸官屋如樊籠
安得雪嚼郎官紅
海山僊人隔千里
忽到眼中宗派同

羣仙南遊三神山
親留冰丹祛暑裨
藥珠侍宸輒分似
我其詩之累百番

次韻至能湖上

春山如染費人詩
驟馬新堤拂柳絲
杜宇一聲春欲暮

海棠睡去未曾知

楊柳枝

綠陰深護碧闌干，拂拂春愁不忍看。
燕子未歸花落盡，一簾香雪晚風寒。

扣盡青青恨未消，春風一夜長新條。
多情也似相欺得，愛惹釵頭翡翠翹。

晴日遊絲亂入簾，夕陽更忝酒家帘。
粥香餠白清明近，闕挽柔條插畫簷。

小橋風定綠烟垂幾送行人此別離蹀躞玉駝嘶草去
啼鶯寂寞雨千絲

幾日春寒怯上樓樓頭烟縷拂簾鉤相看瘦盡渾無奈
一種風流各自愁

觀山

一層雲放一層山小市人家翠欲環檢點只疑低數尺
一層山向隱雲間

過湖

纔出城來便不同
綠楊微拂藕花風
過湖船用百錢買
卧看雲歸南北峰

暑中雜興

一刻之間值萬金
苦無人可共幽襟
幾年不作西湖想
聽得啼鶯不自禁

不慣山中夜
月寒滿窓樹影蘚花乾
移床近壁不敢卧
恐是龍蛇之屈蟠

今年不上一竿竹
渠豈於人亦世情
風雨尚餘千个在

結巢吾欲聽秋聲

白鷗吾有一日雅疇昔見之相與親滄浪忽欲從此逝
嗔我手揖無詩人

是非不到野溪邊只就梧桐聽雨眠睡熟不知溪水長
鷺鷥飛上釣魚船

平生多可曹修士說我唐詩最逼真不道寒驢風雪裏
何如黃犢過比鄰

俚謂革鞢烏脚鬼吾尊毛穎黑頭公與鞢作傳何為者

穎則萬世文辭工

只鋤蔬甲亦妨閒久與溪雲斷往還今日偶來僧却在
共煎茶喫話廬山

立秋

秋日尋詩獨自行藕花香冷水風清一涼轉覺詩難做
付與梧桐夜雨聲

書元可扇

南薰殿上薰風老雨便飛來占取涼書帶香眠愁杳渺

雲侵清簾竹方床

記畫

閒雲古木山藏寺野渡孤舟水落磯
秋色無人空黯淡竹門未掩待僧歸

漁父詞

晚晴鋪網占鷗沙各自分魚就酒家
洞口醉眠船正暖碧桃流出兩三花

陰陰深樹晚生烟雨急歸來失繫船
白鷺不驚沙水淺

依然共在綠楊邊

烟波渺渺一輕篷
浦溆生寒蘆荻風
昨夜新霜魚自少
滿江明月笛聲中

沽酒歸來雪滿船
一蓑撐傍斷磯邊
誰家庭院無梅看
不似江村欲暮天

龜巢夜宴

落日鴛鴦睡淺波
荷花初醒水微波
玉簫吹斷晴雲濕
最覺池寬得月多

送劉子就試

竹雨梧風滿袖涼
踏槐仍逐衆人忙
一觴共滴蟾蜍露
併遣五千書傳香

小技文章道未尊
入時新樣更難論
鵲袍纔脫須重讀
六籍久為場屋昏

羹蓴

烟雨中間幾白鷗
藕花菱葉小亭幽
紫蓴共煮香涎滑
吐出新詩字字秋

鄭文振席上

香篆燒殘小玉蚪
荷花深處浴鳬鷗
談詩未了催行酒
忽送清歌淺黛愁

寄越友

茂竹脩林已陳迹
禹穴剡溪俱勝遊
秋風倘未理歸夢
我欲買船官渡頭

湖山掩映信樂國
烟雨淒迷非故鄉
青燈何日一杯酒
江頭極目吳山長

跋至能所書西湖洞天事

西湖天下奇絕處定有老僊時下觀重來俯仰已陳迹
但見孤山烟霧漫

圯上老人親墮履衡山道士共聯詩向來此事亦多矣
我故於君了不疑

陪劉提察少集四聖觀

江山於我故眼青我亦輒以詩酬之東華昨夢已塵土
千萬勿令鷗鷺知

詩人胸次倒磊塊試澆之酒將何如作詩不壓林逋倒
正恐湖山亦厭余

宿芳潤用壁間韻

只為梧桐怨夜長不知楊柳老年芳林梢一片過雲雨
便作秋聲占取涼

次韻牟監簿

幾攜筆硯傍書林吟到更寒月未沈有客忽從天祿至
人間便隔五雲深

秋聲滿院有誰來亦欲從君話老懷隔竹已敲茶白雪
不知何日又清齋

夢放翁為予作貧樂齋扁誠齋許畫齋壁予本
無齋亦不省誠齋之能畫也

晴窓欲曉鳥聲春喚起藜床入定身老去不知三月暮
夢中親見兩詩人

早春山中

空濛山翠濕烏紗逗密穿深一逕斜誰畫秋厓滿頭雪

石檀倚竹看梅花

其二

竹邊門自不須關
留與山雲共往還
芳草初齊梅點點
綠絲茸地鹿胎斑

其三

蘭未曾芽柳未絲
是渠春早是春遲
草塘尋見春風處
問訊如何自不知

其四

吟入梅花倚樹腰不知聲撼雪飄飄
山翁只道春無力
半日黏鬚未肯消

其五

同時乞得杏花栽一樣高低一處栽
自是春風不齊整
半零落盡半胚胎

元夕

團蒲曲几雪鬢髻寒入青燈澹似僧
只有梅花一林月
酒盃詩筆已無能

其二

去年人老已蒼華
野藪山醪辦吐嗟
到得今年人又老
也無筋力看梅花

其三

莫道山家不挂燈
脩身寶月一團冰
清寒照見諸人膽
却問諸人見未曾

其四

老去歡悰久已無
病來瘦骨不勝扶
山居幸自依青士

身事何曾問紫姑

入村

十日春霖一日晴
打包作意辦山行
月明夜半雨聲急
不道老天無十成

其二

山深未必得春遲
處處山櫻花壓枝
桃李不言隨雨意
亦知終是有晴時

其三

閉門覓句每無悰
句在茅茨烟雨中
和雨和烟收拾取
等晴却寫與東風

其四

宿雨初晴曉日晶
彌川滿谷白雲平
爛銀堆裏素螺髻
畫出江潮萬里橫

雁來紅

是葉青青花片紅
剪裁無巧似春風
誰將葉作花顏色
更與春風迥不同

其二

秋入山籬葉正丹
老天渾誤作花看
不知宋玉今何似
雁欲來時霜正寒

月下

月明正午一聲雁
山靜如秋兩袖風
鶴與蒼頭齊睡着
無人知我此山中

其二

春風不到莓苔石
山月自隨烟水身
窮是世間常事耳

不知顛倒幾多人

買蘭

幾人曾識離騷面
說與蘭花枉自開
却是樵夫生鼻孔
擔頭帶得入城來

秋崖集卷二

欽定四庫全書

秋崖集卷三

宋 方岳 撰

詩 七言絕句

茶蘼

山徑陰陰雨未乾
春風已暖却成寒
不緣天氣渾無準
要護茶蘼繼牡丹

其二

手插春風十萬條野香落絮玉搖搖黃鸝莫誤看花眼
等得南薰雪未消

牡丹多不開花

少作花頭多作叢十分能有幾分紅春工自不容人力
抱甕窮年笑此翁

其二

韶風萬物照吾廬昨歲駢頭今併疎自是愛花心不足
何知物物有乘除

觀荷

南薰獨擅水雲鄉
不許人間別有香
是草是花開一遍
春風却似欠商量

其二

春紅樹樹或叢叢
一一托根塵土中
不道獨清冰
炎天玉立水晶宮

其三

紅紅白白兩娉婷
一種風流各典刑
紅亦非紅白非白

阿嬌微醉阿環醒

其四

蓮有瀟溪梅有逋
兩家言句滿江湖
自憐尚與梅花隔
曾識先生太極圖

其五

花葉根莖迥不同
略無此子犯春風
羽衣縱落尋芳後
解作清涼烈日中

山橋月夜

寒聲策策琅玕碧香氣浮浮菡萏紅六月人間苦炎熱
獨搔殘雪月明中

秋熱

蘊隆日日等西風等得西風更蘊隆四十日秋無點雨
誰將消息到梧桐

其二

山氣熾熾旱火光牆頭枯草半青黃飢腸慣作晴雷吼
且乞梧桐一夜涼

晚秋猶熱

九月年時已肅霜今年九月尚追涼
幸吾絺綌猶無恙
杜老何煩苦自傷

其二

適自相遭各有時莫悲團扇與秋辭
班姬不死天無準
定悔當時作許悲

即事十首

窺園何物愠無端
疥手偷將玉雪團
不道主林神忌諱

鳥鳥聲樂併催殘

野塘尺水亦生烟寧有餘波可及田商略且為魚作計
須臾毋死待豐年

畦丁譚懶欲誰欺趁我山行始一犁只有山花山鳥笑
主人元自不曾知

藤蔓穿籬礙草扉與僮扶起繞松圍髯龍鱗甲動雲雨
縛着空山莫遣飛

龍骨翻翻水倒流藕花借與稻花秋魚兼熊掌不可得

寧負風光救口休

記得秋風此削瓜偶遺子亦自成花生造化無終極
但有根芽未可涯

巖暝林霏日夕佳百年寧復此秋崖不須更問青烏子
一錡相隨死便埋

赤日黃埃槁欲焚賽神迎佛正紛紛天公老手何關汝
一雨晴無一點雲

得搖牙處儘搖牙底用鳴聲遶鬢譁政自為渠眠不熟

西風吹葉打窓紗

殘鬢蕭蕭不滿梳
秋風椎髻立庭除
日明照見峻嶒影
自是山僧不是予

釣臺

羊裘偃蹇釣烟沙
不肯雲臺定等差
漢室了無塵土在
滿江風月自蘆花

題雄觀

送出青山點點愁
數聲柔艣隔滄洲
白鷗不受人間暑

明月一江天地秋

次韻酬因勝老

誤脫農蓑拾漢科
空山奈此月明何
秋風又跨揚州鶴
行路正難愁思多

雁落平沙字字愁
打包不肯與山留
一篷煙雨載秋去
詩在江南蘆荻洲

淺山如霽水連天
江北江南路幾千
入夢老親雙白髮
歸與早及菊花前

客饌銀茄不敢送場屋士

秋風誰怒水中鱗昨夢不疑杯裏蛇迸齒清寒銀粟粟
不隨鹽酪供毗耶

次韻鄭省倉

買魚聊復醉酖船萬事從來付老天欲辦把茅無計可
不量吾力更籌邊

歸去來兮月一船世途難似上青天烟蓑自與輕鷗狎
却在風濤阿那邊

丁祭

紫薇花下玉丁東
夜午牽牛亦未中
孔壁尚餘金石奏
捲班翻過玉成宮

中秋

黃塵茫茫行野馬
白髮混混爭蝸牛
老心如水夜聲寂
明月不減山間秋

次韻齋宿

可是詩邊欠老干
蘚床相對話燈殘
秋城一夜江湖晚

風雨重陽菊自寒

黃花白髮兩闌情併入齋房長短更久客自知秋意思
底須蛩雨做寒聲

題甘露寺中峰

六朝晴樹一江秋盡入風烟頂顚頭老手更擎江色出
小亭景却勝於樓

金焦兩點自東西着我於中亦一奇
菰葉蘋花秋共晚
山寒未必白鷗知

送琴遂還楚東

一生坐與蛇添足萬事不如龜縮頭亦笑軍持太多事

孤桐自了月明秋

脚根踏地袈裟破鼻孔撩天拄杖橫掃秋雲趺足坐
荻花半落晚風晴

夢中

凡我同盟鷗鷺羣既盟之後亦幽欣山中芝朮香堪煮
鶴未歸來空暮雲

同前

樹擎晚色柔枝碧
兔睡晴香老月寒
自滴玉蜍秋滿袖
輕雲片片泊闌干

東津

秋老江南隔岸山
斷雲衰草雨斑斑
烟帆未可橫江去
鳴榔恐妨鷗鷺閒

雨宿

雨宿疎篷不耐閒
蘋花菰葉老江干
鷺飛欲下忽驚起

秋水新添一寸寒

次韻梁倅秋日白牡丹

自掩窓紗護夕陽
碧壺深貯溜晴光
可曾見此春風面
淨洗鉛華試曉霜

蘋桐花

厥草惟夭簇絳繒
猩紅初滴尚炎蒸
西風坐閱芙蓉老
合是花中耐久朋

其二

似子圓紅不似花綠叢
擎出野人家亦知吟骨
今當換
火候初成獨體砂

題偶愛

每評吾郡佳山水當以水西為最奇
徑向水西非具眼
不眠偶愛不渠知

長汀宜日山宜雨盡在鷗看鷺
聽中想見夜寒留客醉
倚闌拍手喚漁篷

隨行茶竈曾同宿看盡朝嵐與夕霏
一片詩愁秋渺渺

樹林深處見僧歸

溪雲莫怪塵埃面更與青山把一杯未省此詩容寫否
聞渠曾識謫僊來

湖上醉題

山知吾亦以詩豪疇昔於山只淡交清得不多贏得瘦
一生悔讀楚離騷

夢過湖

萬柄風荷秋渺然百錢又買過湖船菰蒲鷗鷺渾相識

驚怪人間已十年

行田

屋頭烏柏午陰密牛與牧童相對眠不是官中催稅急
十年前已學耕田

老農具榻茅茨底準擬先生欲岸巾笑道已呼兒貰酒
月明且不厭家貧

月蝕

老兔酣眠一夜霜妖蜚健啖未渠央人間今欠玉川子

生語聾牙滿世香

次韻陳帳管秋思

秋風吹裂舊荷衣自讀離騷倚落暉已覺蘆花洲渚冷
水天歸雁着行飛

人家一樣捲湘簾惹起新愁到酒邊久客不知詩瘦損
小樓孤倚月娟娟

訪恭率翁不值

且容晴夢泊鷗沙傳語茶頭莫點茶山客不歸秋自老

滿城風雨又黃花

還留石亭

枯荷折葦卧鳬鷗
小雨輕烟畫出秋
自喚短篷將老硯
石亭尋客了詩愁

次韻客饗鱸蟹

江鱸淮蟹不論錢
肯到湖邊明月船
玉鱠雪螯新煮酒
桂花香後菊花前

戲簡王尉

半床明月老秋風未必詩人一例窮比似樂天猶欠在
是非已落酒杯中

楚雲遲上木蘭船惹得秋辭亦浪傳不直翠眉親唱與
故應無分學彭宣

少微樓

不奈梅花雨許愁天寒孤倚夕陽樓近城鷗鷺逢人慣
肯與漁蓑共釣舟

洞元小集

鶴骨清寒不受吹
白雲侵硯懶題詩
雨深更覓山寒甚
過了重陽菊未知

答惠楮衾

吳宮金蹙鳳花綾
春暖熏籠換水沈
那似冰橋楮夫子
滿牀明月解微吟

次韻別友

硯香不肯與山留
雨浥寒花斷送秋
後夜酒醒詩更好
淡烟荒草並漁舟

重陽

帽不禁吹怯酒觴只攜老硯了重陽黃花未抵淵明瘦
却做離騷以上香

九日道中淒然憶潘邠老之句

滿城風雨近重陽城脚誰家菊自黃又是江南離別處
寒烟吹雁不成行

用呂宗卿山亭韻

約住山雲倚斷欄雲如秋薄與山環為山醉矣無山句

山不負予予負山

田頭

田頭科斗古文字石上白窪山鼎彝勘破世間煩惱障
醉而已矣不吟詩

秧田多種八月白草樹初開九里香但得有牛橫短笛
一蓑春雨自農桑

嚴陵待鎖

一舸秋風夢亦寒津人只作賈胡看斷橋袖手暮烟合

等得蘆花雪滿灘

關却疎篷只恁休莫留霜月伴孤舟
津亭萬一商分數鎖到明朝何處求

過陳湯卿溪堂

手葺溪堂旋補茅好山帶郭轉林梢
與君共有吟詩癖月下柴門不厭敲

宿珠溪

一錢不直管城子萬事稱好孔方兄
山房自做松風夢

星斗闌干霜月明

種芥

不論青紫已離離
烟濕春畦手自治
一笑摩挲空洞腹
是間儘納幾須彌

種韭

下秧已覺齒生津
坐想堆盤雨夜春
政恐厨人無變饌
庾郎貧不似吾貧

種菰

老圃相傳秋後菰磚爐石鉋一年冬寧知遲種遲於我
又見南薰上番風

採筇

此君有節瘦如許老子無心酷似之莫向人間危處去
溪雲逕雪儘扶持

觀刈

石田犂确底須嫌苦說頻年不下鎌烟雨一犁經老手
翻匙香雪十分甜

鵝鮓

翠箸紅泥麴米春
篆灘風月入厨珍
誰令渠識黃庭字
且醉胸中無字人

擘鱗

秋來何但食無魚
老去寧須腹有書
空洞略容君幾輩
草泥郭索一從渠

次韻姚監丞斫鱸

冰盤飛縷落芳馨
雪色微紅糝玉霏
喚起苓笻十年夢

詩腸平截鷺波清

旋搥金蘢剝玉葱半盂膏酒洗冬烘吳中風物今猶爾
說與厨人寧舍熊

少微山觀橘

手劖蒼烟竹迳深霜寒錯落萬黃金何年共話商山舊
分種歸來欲滿林

聞角

殘角吹霜月欲斜天寒無奈客思家不知野竹滄江上

開到梅梢第幾花

聞雪

黃塵沒馬長安道殘酒初醒雪打窓客子慣眠蘆葦岸
夢成孤槩泊寒江

風月堂夜飲

霜洗橫枝月上初春曩更可共談無玉杯一一寒於雪
貯以詩腸渺似湖

嘲鷺

曾有詩矜白鷺閒一生詩眼乞山漫朝來更覺忙於我
雪沍蒼溪不道寒

劉遜子架閣餉江茶

琵琶亭下春寒夜濕盡青衫竟為誰江草江花恨何極
雪甌如此却無詩

醉眠彭澤幾何日只與吟詩辨秫田靈草獨醒山雨外
可曾持到漉巾前

光孝寺作茶供

一藤碎踏兩山雲看盡朝嵐與夕曛
留得如來捨身相共敲蒼雪了爐熏

次韻君用寄茶

茅舍生苔費夢思竹爐烹雪復何時
北山怕有移文在謹勿便令猿鶴知

除夜

雲片初飛歲已除竹籬梅自可吾廬
歸來只有窮相守未議移文送却渠

其二

莫笑青衫霜葉枯六年不改舊稱呼
人間書疏非吾事菜縷春盤何處無

其三

更與梅花把一盃醉題帖子等春來
須臾便是隔年事留得寒香一併開

其四

春入荷葭塢亦奇塢名不枉與天知
綠章併按閒池沼

豈但烏臺要勘詩

其五

幸有牛衣暖似春可曾半字日邊人不知相國何為者
撩得諸公屋大嗔

其六

眼底童烏已七齡吾伊略亦記羣經丁寧莫就中書試
只可松邊竹下聽

山庵

枯松煮瀑香可吸野竹生萌甜可掘山中道士歸不歸
一夜猿鶴老明月

題趙漕小蓬萊

乾坤不盡一蘧廬方寸中間幾太虛辨着海濤三萬里
乃翁底用費分疎

其二

老夫曾到道家山太乙青藜夜叩關著作承明今付子
仙壺元不隔人間

寄遊山友人

不是山陰訪戴船
真成迷局爛柯仙
徑行處用規摹取
歸與都人作畫傳

紫極宮用呂宗卿韻

雲濕棋枰不堪著
滿壑松寒鳥聲樂
向來石鼎老彌明
松下無人啓玄鑰

書客星閣

平生看破劉文叔
不肯依乘赤伏符
底處只緣曾識面

故應人喚作狂奴

小留不過貂蟬耳亦恐遭人白眼看
已自費辭侯霸輩
歸來漱石暮江寒

紫虛觀

小炷爐熏待瀹茶瓦盆添水養蒲芽
江南地暖得春早
開盡雪籬無數花

寄題章氏起青樓

結樓多與青山對却是青山不對渠
見說蜃巖排闥入

一窓晴色共殘書

寒青拔起二千石山是一分雲一分切莫向渠談世事

怕渠說與沈休文

題郭氏繼一堂

繼一翁挂衣冠神武門而去其時理宗賜處士號
以嘉寵之睿藻奎文照映千古名卿大夫自退傳
越公而下咸為歌詩所以贊頌之者甚備岳無所
復容其喙乃為反離騷以規之曰

徑與三茅借一峰自攜周易聽松風
隱居本為逃名計結入頭銜却不中

漁蓑釣艇越中居底處烟波不屬渠
一曲鑑湖須勅賜却令鷗鳥費分疎

寄題趙德成東巖

好山倒合詩人管新出東巖付此公
略向畫圖曾半面石床定許聽松風


人間無處著我輩只可飛泉蘚石邊
習氣猶餘子虛賦

苦令猿鶴怨風烟

空山誰可閒來往自種梅花伴月明
小築便為身後計此奇千古未忘情

陳湯卿致紹梅

林下風流自一家縱施朱亦不奢
華冷香猶帶灞橋雪不比春風桃花



秋崖集卷三